
G, XIII, 427 TO ag 668 705 AUGUSTO SERENA

# CANTILENE


SECONDA EDIZIONE




STAB. D'ARTE GRAF. IST. ABRAZZA
1909



A RAFFAELLO BARBIERA CHE ILLUSTRÒ
DA MAESTRO LE « POESIE VENEZIANE »
OFFRO CANDIDAMENTE QUESTE « CANTILENE »
PER RINGRAZIARLO DEL CARO DONO PREZIOSO
DELLA SUA AMICIZIA.



## LA VENDEMA



#### LA VENDEMA

Te ricòrdistu el di de la vendema?

Mi, quando che ghe penso, el cuor me trema.

Se andava tutiquanti in alegria su par i trozi de le nostre rive: i castagnèri, come ombrele vive, sora la testa i ne fazeva ombria; se andava tutiquanti in alegria. Ti, beata e contenta, te corea davanti a tuti come una regina; su la tènera lopa e l'erba fina el piè zovene e franco te metèa; ti, beata e contenta, te corèa.

Oh bei oci de tortora amorosa,

che a mi te me voltava a quando a quando;

oh bele man, che, i pigri incoragiando,

te alzava e te bateva! oh man de rosa,

oh bei oci de tortora amorosa!

La riva ne ga parso una Babele
quando che finalmente semo entradi;
tose e tosati tutti indafaradi
a vendemar, a portar via zestele:
la riva ne ga parso una Babele.

I cantava «L'amor è una catena»
intanto che i tirava zo la ùa;
e l'aria, de quei balsami imbevùa,
la portava lontan la cantilena
i cantava «L'amor è una catena!»

Paron Gigio vien zo par incontrarne, a braza verte, pien de maravegia; el ne saluda, el ciama la famegia, a momenti non 'l sa più cossa farne: paron Gigio vien zo par incontrarne.

La nostra comitiva ghe va drio
lodando l' uva bianca e l' uva mora;
e lu ghe dixe a questa e quela siora
«Le magna pure: ghe ne xe un desio!»
La nostra comitiva ghe va drio.

Mi solo, co ti sola, se se perde soleti, a brazo, in mezo a le piantade: oh primo incontro d'amorose ociade, oh bei basi de fogo in mezo al verde! Mi solo, co ti sola, se se perde...

Mi despico un bel graspo da le vide
e po' te digo «Lo magnemo insieme?»
Ti te dixe de si; par che te treme;
ma te vardo i bei oci, e i oci ride:
mi despico un bel graspo da le vide.

Un gran a ti, e un gran a mi, magnemo quel bel graspo sentadi su l'erbeta; se magna l'uva, e i làvari se neta co i basi che più dolzi se scambiemo: un gran a ti, e un gran a mi, magnemo.

Quando nuvole e lampi in ziel se vede, e i ton se sente, e subito la piova; se se alza par scampar, e se se trova co i altri, che un diluvio za i prevede quando nuvole e lampi in ziel se vede.

Noaltri do, soto 'l to scial, a brazo, da drio de tuti come zente straca. se corèa sì, ma co la santa fiaca; non se sentiva gnanca quel scravazo noaltri do, soto 'l to scial, a brazo!


Se sero i oci, mi te vedo ancora
tuta contenta strènzarte al me fianco,
tuta bagnada el to vestito bianco,
tuta bela e ridente come alora;
se sero i oci, mi te vedo ancora.

Te ricordistu el di de la vendema?

Mi, quando che ghe penso, el cuor me trema.



## MI FAZO EL MOLETA



#### MI FAZO EL MOLETA

Lontan dal trabácolo la fola indiscreta! No rido, no ciácolo mi fazo 'l moleta.

La zengia xe in ordine, la roda ben onta, l'acqueta vien limpida, la gamba xe pronta; e, apena che zàpega el piè su la mola, la roda prezipita, la visçia, la svola.

De tempra bonissima, d'azal garantio, tra i feri e le roncole 'na Lama ò scoprio:

l' ò sempre co' scrupolo tenuda finora;
e, prima de vénderla,
Dio vogia che mora!

Se un poco son libaro, (servio chi comanda) la Lama mi prèparo che tegno da banda;

su 'l picolo turbine la frego, la zogo: che lampi, che sçesene! che sguinzi de fogo!

L'è un'arma finissima l'è tuto Maniago: un filo xe 'l tagio, la ponta xe un ago.

M'imagino, usandola, de védarla in moto: oh miseri, miseri, chi càpita soto! Vardève, no ciacolo:
la gamba xe stanca,
le man le me piziga,
e l' acqua me manca.

Mi lasso 'l trabacolo, mi coro da mato : col fero che stermina mi assalto, mi bato.

Dov'èli quei tàngari da un boro per zento, che, forti del numaro, me dava tormento?

Mi, povaro diavolo, süava e güava; e lori sporchisie e sassi me trava.

Che rabia! Ma, caspita, con man impegnade podeva difendarme da sputi e sassade ?

Me molo, me véndico, go massa sofrio; el sangue me sùssita più forza, più brio,

Oh, strage santissima, oh, alegra vendeta! La Lama xe un fulmine in man del moleta. Pecà che la scortega più schene che pèti, parchè quei magnanimi i volta i gareti;


ma intanto la polvere i morde, i tabaca; la Lama ghe insánguana la vita vigliaca.

O Lama, refilete!
O roda, va torno!
Za l' opera termina,
xe prossimo 'l zorno.


Lontan da 'I trabacolo la fola indiscreta! No rido, no ciacolo. mi fazo 'l moleta:

le gioxe xe lagreme, el cuor xe la mola, el fero che prèparo el xe la Parola.






# LA TRADIDA





#### LA TRADIDA


Xe tardi: xe deserta
la Cesa, e quasi scura;
la povareta, inzerta,
va dentro co' paura.


La se inzenocia sola,
la sconde zo la testa:
no vien una parola
dal cuor che xe in tempesta.










































































So tuti i privilegi del Marcà; so la Cesa co tuti i so Prevosti; so le Deputazion e i Podestà. So Sindazi, so Zonte e Consilieri; e so tuto l' esercito dei osti e tuta la legion dei Cavalieri.

IV.

Ma, per tuto l' amor che mi te porto,
ma, per tuto l' onor che voria farte,
per quel che pol el cuor, e sogna l' arte,
no te domando — o tera — che un conforto.


No te domando vile per diporto; nè voti per vegnir a governarte. — El zingano, che va de parte in parte, el se contenta de tornarghe morto. Mi te domando — cô sarà quel'ora — che te me segna tanto de teren da far el sono che ogni mal ristora.

Xe coi so veci che se dorme ben.


Bei fioreti de campo per dessora;

e verde intorno; e in alto el ziel seren.





## RITRATI DE SCOLARI



### RITRATI DE SCOLARI

Go messo el to ritrato in Libraria

co i me scolari d'ogni parte, Oreste. —

Écoli, drio le lastre, che i me spìa:


oh, quanta zoventù! che bele teste!

A scuola, se li umilia, se ghe cria, se dixe de conzarli per le feste; ma, dopo, cô i finisse, cô i va via, despiase de dividerse a le preste. Cô saró vecio mi, de tanto in tanto passarò 'sti ritrati alineai; me vegnarà i so nomi per incanto; parlarò de 'sti zorni tramontài; e, per no confessar che gavèa pianto, col fazoleto forbirò i ociài.



## AI CONSILIERI DE TURAZZA

SUPLICA



#### AI CONSILIERI DE TURAZZA

Suplica

Bepi Panziera, un pòvaro barbier che me ga fato el pelo e 'l contrapelo, e che 'l ga mantenùo col so mistier la dona la so tosa e 'l so putelo,

dopo de aver penà più del dover, el xe morto, e 'l fa barba adesso in zielo; ma 'l ga lassà pitoca la muger,' e i fioleti co fame; e vien el gelo! Ferucio, el puteleto, fa domanda d'esser acolto in Casa de Turazza; e 'l me lágrema drio che 'l racomanda.


Ah, no lassélo scanagiarse in piazza!

Tolèlo qua; postélo in qualche banda!

Abandonà, cossa volèu che 'l fazza?



## SORA 'NA SVÈNTOLA



## SORA 'NA SVÉNTOLA

Sventoleve, sventoleve, care done, tuto el di: el bon tempo, ricordéve, care mie, no torna pl l

Sventoleve a la matina, sventoleve a mezogiorno, sventoleve cô turchina se fa l' aria tuto intorno.


Da sto caldo malignaso, care done, difendè oci, boca, fronte, naso, tuto quelo che gavè:

Fêghe fresco a quel tesoro de cavèi che xe un portento; che i sia d'ebano o pur d'oro, fê che i zógola col vento;

fêghe fresco a quele zegie che i bei oci custodisse, Iuminose maravegie che ne incanta e ne ferisse;

fêghe fresco a i bianchi pêti che no pol trovar più fià; benedeti quei frescheti che la vita ve ridà!





#### ESAMI

Sempre, cô fazzo esami, in pompa magna, co tanti professori in giro tondo, fra scolari che trema e che se lagna, mi sero i oci, e vedo un altro mondo.

Vedo, ancora, una scuola de campagna; i mestri e 'l diretor, sentadi in fondo; mezi i putei, de fianco a la lavagna; sti altri mezi, de fianco al mapamondo. El diretor dixèa « Ciamè sto quà » :

la mestra domandava « Chi xe Dio ? » ;

e 'l mestro « Tre più quatro cossa fa ? » ;


e, cô i dixeva « Bravo xe finio »,

scampava a casa che parea pagà,

e tuto 'l mondo me pareva mio !



# UNA DICHIARAZION DEL SETEZENTO



# UNA DICHIARAZION DEL SETEZENTO

(Per un quadro del pitor G. Ponga)

« Madamigela, — el zovene risponde son vissudo a Parigi; son sta' fora; oci morl go visto e dreze bionde, tuto quel che seduse e che inamora: a Corte, in campo, per el Regno intiero, go avudo mile seduzion: xe vero.

Ma ve giuro, per quel che go più caro, per la gloria del nome de famegia, che ogni beleza, ogni piazer più raro, nei saloti, nei palchi e nela regia, no ga possùo svoltar un solo istante el devoto pensier del vostro amante.

Fra tanti cascamorti e tanti scempi,
mi son passà da cavalier cortese:
come un bon paladin dei primi tempi
co' l' arma de famegia su 'l palvese,
e co' l' impresa, che ga tanta fama,
El me' Dio — el me' Re — e la me' Da m /

Son tornà; ve go visto; go sentio


tutoquanto l'ardor dei nostri amori;
e go dito: Xe impossibile che Dio
el vogia separar i nostri cuori.
O la trovo soleta, o pur ghe scrivo
« Madamigela, el primo amor xe vivo! »

La bona sorte vol che mi ve trova in mezo a tanto verde, a tante rose; dove tuto se svegia e se rinova, dove parla d'amor tute le cose; dove i fior se soride, e dove anch'ele le se parla d'amor le tortorele.

E adesso in vostra man xe la me sorte, el me' destin xe su la vostra boca. O amor o delusion; o vita o morte; pronunziè la sentenza che me toca : dixè, Madamigela, una parola : donème el lampo d'un' ociada sola. »



# LE POLPETE DE RENZO



#### LE POLPETE DE RENZO

AL PROF. G. BINDONI
CHE NE OFRIVA LA DIMOSTRAZION
IN UN BANCHETO,

Le polpete, che Renzo ga magnà quel vénave famoso che savè, gavè proprio rason: le xe ste qua.

Lassè che i altri dubita ; lassè che i sapïenti rida ; chi combate l'eror, xe combatù , no ghe badè. Mi sero i oci : mi rivedo Olate, e l' ostaria, co un Bravo su la porta, e, dentro, Bravi che la mora i bate.

Vedo l' osto, la tecia che lu porta;

Gervaso in festa, e Renzo senza noze,
e quel Tonio bricon che lo conforta.

Vedo i goti, i tagèr, vedo le boze; vedo proprio co i oci; e co la recia sento quel che i se dixe a bassa voze.

Fin che l' osto desquerze la so tecia; e vien fora un odor che ne consola: benedeto el magnar fato a la vecia! Mi son co lori; mi me sento;
e zerco le polpete, e sento 'l magro;
e ve lo giuro su la me parola.

De sora, ghe xe zègola co l'agro, ma, dentro, tutaquanta roba bona, che a magnarla me ingrasso e no me smagro.

I fa da rídar quei che no ragiona, e i dixe che Manzoni avea picà el lunario dadrio de la poltrona!

Lu, che tuto ga leto, e ricordà, che 'l ga quei di col genio rivissudo, che 'l ga quasi quei di fotografà, proprio don Alessandro ga possudo far le polpete, al venare, de grasso? . . . Che la creda chi vol : mi la refudo.

Se fusse vero, restaria de sasso ;
e, fra de mi diria « Da quela mente
no gavaria credúo : me ga despiasso! »

Ma no xe vero; no xe vero gnente:

col calendario in man, de zorno in zorno
la vita el ga vissuo de la so zente:

come Dante (mi sempre a Dante torno)

che, Inferno Purgatorio e Paradiso

visitando, e girando tuto intorno,

el se ga fato un ordine preziso fin per le cosse prive d'importanza, e mai da quelo no 'l se ga diviso.

Per questo, ritenè che la pietanza de quel famoso vènare la gera (secondo che lassù ghe xe l' usanza)

le polpete de magro: e che stasera de magnarle me par, co Renzo e Tonio e Gervaso che leca la supiera.


E tuti quei che ga del comprendonio e fin i pissinini dei Asili, no i ga più dubi, gnanca per insonio. La critica xe l'arte dei cavili, e la xe deventada un'opinion come la matematica de Grili:


ma, quando se ghe dà dimostrazion apetitose tanto, e tanto pratiche, la vien zerto a una giusta soluzion.

Vu gavè dato prove matematiche; ma quela, che stasera vu ne dè, la xe de le più bele e più simpatiche.

Per noaltri, più dubi no ghe xe: le polpete, che Renzo ga magnà quel vènare famoso che savè,

gavè proprio rason, le xe ste qua !





#### LE RANE LE DOMANDA UN RE

Le rane d'un paese trevisan, stufe d'un Re che ghe parea de legno, le ga fato un gran strepito e bacàn perchè Giove ghe dasse un Re più degno:

e Giove, che volea chietar quel regno, a un Bissôn el ga dato el scetro in man; se ga messo 'l Bissòn, senza ritegno, a morsegar le Rane come un can. Quele pòvare bestie, senza mezo de salveza, le ziga « Oh Giove! oh stele! se stava megio, cô se stava pezo! »

Ma Lu risponde: « Oh stupide ranele, no avè vossudo un Re de legno grezo; tignive questo che ve fa la pele!»



#### LA RASON VAL MANCO

El Lovo e l'Agnelin, per azidente, insieme, a le fontane i s'à trovà; ghe dixe el Lovo a l'Agnelin paziente: « Perchè me gastu l'acqua intorbidà? »

Dixe l' Agnelo: « No xe vero gnente! ti te beve lassù, mi bevo quà! »

« Ma son stufo de ti ! » « Son inozente! »

« Alora, me ga ofeso to papà! »

« Oh varda che mi son ne l' inozenza; mi de rispeto, o Lovo, no te manco; per l'acqua... sará sta la Presidenza! »

Ma st' altro ghe sprofonda i denti in fianco; perchè, quando ghe xè la prepotenza, l' età val poco e la rason val manco.



#### III.

### PERCHÈ 'L LEON VIVESSE

'Na volta, che 'I Montel gera imboscà, e 'no ghe gera Guardie e Deputati che la tignisse longa a tuti i pati perchè no 'I fusse sùbito espropià;

el Leon a la caza el ga invidà un Mulo e un Asinel dei più fidati : e, quel zorno, rondoni e ziligati a branche, a zeste, a sachi i ga ciapà. Tuto finio, dixe 'l Leon : Scoltè !

meza preda me vien perchè son forte,
st' altra meza me vien perchè son Re. »

Cussì le Bestie le se dava guera senza interessi nè rason de sorte, perchè 'I Leon vivesse su la tera!



IV.

#### O LEONI SUPERBI . . .

Andando per el solito Montelo
a passeggiar So Maestà 'I Leon,
un spin antimonarchico e ribelo
'na zampa ghe à sbusà come un sponcion.

1 zighi del Leon tocava 'l zielo; el moveva le piante a compassion: fin che core la Volpe a quel bordelo, e lu la prega: « Salva 'l to Paron! » E la Volpe: « Zelenza! per chi regna co tanta boria, no go miga cuor: se La ga un spin nel piè, La se lo tegna! »

O Leoni superbi, se '1 destin ve xe propizio e ve dà tanto onor, vardève ben de no ciapar un spin!



## L' ASENO NOBILE

Un Aseno, per éssar rispetà
da 'na Brespa che 'ndava de ronzon,
i gradi zentilizi el ga vantà
che ghe vignia da tre generazion.

« Me bisnona gaveva intimità co un Mul Tedesco e un altro del Giapon; me nono gera Scalco; e me papà sostegniva la coa del re Leon. Per stema de famegia i ga lassà un figo tra do fette de melon: e sotto ghe xe scrito Nobiltà. »

Dixe la Brespa: « I veci, in conclusion, i ga basà, robà, complimentà, perchè se avesse un Aseno in Blason! »

2019



VI.

### ESOPO E LA SATIRA

Un zorno Esopo, che xe sta maestro ne l'inventar ste favole salade, l'andava caminando per le strade, de quà de là, come ghe dava l'estro.

L'incontra un tal, che gera l'ocio destro del Sindaco, e 'l ghe buta un pêr de ociade. Dixe quel tal: « Le gastu terminade ste favole, cavestro d'un cavestro? Quel criticar la zente che comanda, quel parlar franco e no temer un figo, xe 'na lizenza da lassàr da banda! »

Alora Esopo ghe risponde : « Amigo ! No so chi gabia libertà più granda : vu fe' le canagiade, e mi le digo ! »



#### VII.

#### EL LEON E 'L SO SENATO

Xe radunà 'I Senato del Leon:

parla So Maestà; le Bestie scolta.

Ogni proposta che Lu fà, xe acolta;
se Lu stranuda, nasse un' ovazion.

Quando che '1 xe stufà de aprovazion, a darghe la lizenza lu '1 se volta : « Signore Bestie ! 1' adunanza è sciolta ; le sgombra i segi del Senato ; allòn ! » Dixe la Volpe sul partir « Signori ! Nell' Ordene del Zorno go trovà un articolo, omesso ancuó da lori;

mi ghe lo lezo, perchè 'l sia votà :

« Vergognèmose d'esser Senatori se dura sempre sta comedia quà! »



#### VIII.

#### EL GALO E LA MARGARITA

Un bel Galo, paron de caponera, una volta, verzèndose un forame, el scampa de scondon de la massera a becàr su 'na tassa de ledame.

E bèca e bèca, el vede in sta maniera un bel diamante, perso in mezo al strame. Dixe quel Galo: « Cossa xe sta piera, che no xe sorgo da cavar la fame? » Questo fa propriamente al caso nostro.


Le favole, no basta dirle suso;

dopo, ghe vol l' intendimento vostro.

Le inventa Esopo, e mi ve le raduso; ma lu perde la fama, e mi l'inchiostro, se chi le leze no ghen fà bon uso.



## IN BIBLIOTECA CAPITOLAR



#### IN BIBLIOTECA CAPITOLAR


Sior Carlo! Intanto che noaltri stemo respirando la pòlvare a l' ombria; e, a fogio a fogio, tuta roseghemo, come sorzi in graner, la libraria;

intanto che ste carte acarezemo, ste vecce da la ziera scoloria; e, ogni tanto, sui quadri saludemo Avogaro e Rinaldi che ne spia; de fora, xe un splendor de sol che ride; de fora, xe un' arieta che consola; vien le viole, e lagrema le vide;

i tosi fa l'amor, i veci spera; tuto canta e fiorisse e scherza e vola; e noaltri staremo in caponera?



## PUTEI SENZA PAN



#### PUTEI SENZA PAN

Cô mi gera putel, una veceta che dorme soto l'erba del Sagrà (e la torna ogni note, povareta, a segnarme cô son indormenzà)

Ia dixeva: « El piovan se lo rispeta!

Ti bàseghe la man, se 'l te la dà:
recòrdete che 'l ga 'na forfeseta,
e 'l ghe tagia la lengua a chi à pecà. »

De la fòrfese ormai no go paura. —

Ma, cô sento che un povaro piovan,
senza programa minimo, el rancura

tutiquanti i putèi che no ga pan,
me par che la veceta co premura
la torna a dirme « Báseghe la man! »



### CASA NOVA



#### CASA NOVA


Ai me putei.

I vostri cuniceti ga la tana, el vostro cardelin ga la chebeta: no savè che de gusto che i fa nana, cô vien la sera, ne la so niceta?

Stê dunque alegri, che fra 'l verde sana go fabricà per valtri una caseta. Lassè che i diga, che la xe lontana; lassè che i diga, che la xe imperfeta. Inveze valtri, cô sarè cressudi, vivèghe in pase ; guadagneve el pan co le vostre fadighe e i boni studi.

Mi, soto l' erba, dormirò: ma 'l cuor, che vegia sempre, tegnirà lontan el fogo l' ipoteca e 'l disonor.







#### EL SEGRETO DE NADAL

1.

So tuto: ma no gò da saver gnente.

I scrive da tre di; me son acorto;
qualcheduno li giuta; se lo sente;
ma no gò da saver: mi fazo 'I morto.

Se ghe cápito in casa, da imprudente, no se pol dir la confusion che porto! Chi sconde; chi se mostra dispiazente; chi me manda a studiar: e no i ga torto! Ma, domatina, finirà '1 mistero ! . . .

A tuti tre, col baticuor, pianin,
su la ponta dei piè, no ghe par vero

de svegiarme co un zigo trionfal,
butàndome el so plico sul cussin :
"Papà!...la letarina de Nadal...,

H.


E mi — che no so gnente — mi me svegio e vardo intorno a tute quele feste. Per dar sodisfazion, me maravegio : « Cossa vol dir ? che novità xe queste ? »

E po' verzo la letara. « Che fregio! che bela carta de color zeleste! Chi xe che scrive?.. Oh, questi scrive megio de quei che me fa i còmpiti a le preste »

Lori me varda; e 'l cuor ghe salta fora dal gran piazer; e i sta spetando quasi i nomi soi, Dante Letizia Aurora:

mi declamo co gusto quele frasi; trovo i so nomi; ghe li lezo ancora; li ciamo arente, e me li magno a basi.









# CONFIDENZE (Acquarelo de Vettori)

Cònteghe pur, bambina, i to segreti a la Mama che ride e che te scolta; cònteghe pur, bambina, i to progeti a la Mama che ride e che se volta; cònteghe pur, bambina, i to gran casi a la Mama che ride e te dà basi.

Un di, vegnuda granda, in gran tempesta te sentirà 'l to' cuor, pòvara grama, te zercarà de scòndar Ia to' testa, pianzendo, ancora in brazo de to' Mama, per confidarghe una segreta guera, e la sarà, bambina, soto tera!



#### PER SANTA CATERINA



#### PER SANTA CATERINA

DIPINTA IN TAVOLA

DE PROPRIETÀ DEL SIG. GIUSEPPE CARESTIATO

Col muso duro, in tuba, in ociai d'oro, quel critico tedesco xe arivà; el se ga messo sùbito al lavoro, e 'l ga la vostra Santa esaminà.

«Oh bei oci! oh cavei che xe un tesoro! oh carnagion! oh vita che la ga! oh impasto! oh toco! oh gran capolavoro! » Insoma, el gera coto, inamorà. Ma — in fin — el ga voltà la tavoleta, el l' à sbatùa ( la pararia 'na favola !) per veder a cascar la polvareta:

l'à dito po', ch'el l'avaria comprada; che ghe doléa sul cuor; ma che la tavola no la gera abastanza carolada.



LE TESTE DE VETORI



## LE TESTE DE VETORI


Le teste, che scondè per le vetrine a far baussete fra veludi e rasi, o le xè maravegie de bambine che vol careze e che promete basi, o le xe furbarie de sartorele che fa de tuto per mostrarse bele.

Ma, fra i cavéi castagni e biondi e mori, par che l' Aria la sia fra amizi veci; ma, dentro i oci béi che roba i cuori, par che 'l Sol e l'Amor i zoga ai speci; par che sui visi limpidi ghe sia i riflessi del Sil che passa via.

Perchè vu, siè pitor, e no fotografo
e gavè 'I sentimento de Natura;
come un bravo pianista (e no un fonografo!)
che fa gustar 'na bela partitura.
I critizi moderni i xe 'na peste :
la so testa no val le vostre teste.



# A UNA SIGNORA DE ROVERETO



## A UNA SIGNORA DE ROVERETO

MANDANDOGHE IN DONO
UN LIBRO DE "CANTILENE,,
NEL RIPETERSE DE L'ANNO SECOLAR
CHE LA SO ZITÀ PASSAVA
DA MARCO A MASSIMILIAN

La senta, Signora, che festa de rime! Xe'l dir che inamora che tuto l'esprime. Chi xe che se vanta?

Qua, l'omo se gnente:

xe l'aria che canta,

xe 'l cuor della zente.

Se tase 'I strumento, se I' arpa xe sorda, apena che 'I vento ghe toca la corda,

resússita, svola,
canora se leva
la viva parola
che l'arpa no aveva.

Oh. musica vecia che Marco ne intona, te vien a la recia co un far da parona,

col far d'una mama che tuti afradela, che tuti ne ciama atorno de ela.

Te dixe - « Dai monti che varda 'I Tirolo, al mar che dei Ponti sa 'I nome e del Molo, siè tuti cressudi disendo de Si, siè tuti venudi a scuola da mi.

Go a tuti insegnà
le megio parole:
la cuna e 'l sagrà
la cesa e le scuole.

Go tuti istruio nei nomi più bei: a tuti dir Dio, dir Mama ai putei. Co Uscochi per tera, co Turchi per mar ve ò trato a far guera, ve ò fato tornar,

e, alora, del Tempio
go scrito su l'arco
Xe in pòlvare l'empio.
Eviva San Marco ! » -


Cussi questa cara parola ne canta! La cuna e la bara per ela xe santa: la Patria profondo ga un segno per ela: nessuno a sto mondo quel segno canzela!

I Secoli passa,
i vol che la tasa,
ma, in fin, i la lassa
parona de casa.


Bonora, la svegia chi suda la paga; le done, in famegia, lo giuta e la svaga; la fa coi fioleti alegro ogni logo; la sta coi veceti scaldandose al fogo:

la canta a la festa,
la pianze nel luto,
e par che la vesta
de musica tuto.

La senta, Signora, che festa de rime! Xe 'l dir che inamora, che tuto l' esprime!



### EL PUTELO DEL NAUFRAGO



## EL PUTELO DEL NAUFRAGO

Statua de Umberto Feltrin.

Bruta note! La tempesta tuto sgrétola e fracassa; porta al lido quel che resta, torna l'onda e i morti lassa.

Vien, a l'alba, sto putelo su la riva per spïar se 'l conosse el so batelo come un punto in fondo 'l mar. Povareto! in veze, el.trova, fra i rotami, el papa morto... Oh, che angossa! chi la prova no pol più sentir conforto.

Povareto! El se despèra; el lo strenze fredo al cuor; el lo querze co'na piera, senza crose, senza fior.

Ma lu torna ogni matina

per veder che no sia sconta

quela piera che confina


col sabion che sempre monta!...

Cossa importa, co xe l' ora, andar soto quà o là, se vien dirne un cuor ancora « Me ricordo, sa, papà!»





QUEL ALBARO SON MI ...



## QUEL ALBARO SON MI...


Quel álbaro son mi, che ga sentio geli d'inverno e fulmini d'istà, epur in primavera el ga fiorio, senza fruti d'autuno . . . che se sa!

Quel álbaro son mi, che ga nutrio co i buti e co le foge riparà i oseleti che ga fato el nio, e i canta sconti, fin che i svolarà. Ma l' álbaro co i venti el fa la guera e coi russignoleti el fa l'amor, perchè 'l tien la radise soto tera.

O vecia Mama! L'álbaro xe in fior; ancora nidi fra le rame el sêra; ma, guai a lu, se la radise muor!



ANCORA...



## ANCORA...

Ancora, Mama, al cuor no ghe par vero de vegnirte a zercar, co tanta angossa, tra crose e fiori e piere, in zimitero!

Ancora no 'l vol crédar che se possa scòndar per sempre quela testa santa, che quei oci no i veda, e no i conossa!

Ancora el spera, dopo averte pianta, che 'I sia un insonio, che spaventa, e svegia; un bruto temporal, che po' se sfanta.

- No xe più quela, Mama, la famegia; ancuò, no la par più, quela de geri; gnente più resta, gnente se somegia!
- Oh, quando el verde in zima ai castagneri, su su de rama in rama, el se sporzeva; e sbrocava l'onor dei persegheri;
- oh, quando per le rive se storzeva i rásoli de l' uva bianca e mora che vendeme de pien la prometeva;
- oh, quando se podeva scampar fora da ste gran scuole che ne tol la testa, per védar ciaro e respirar un' ora;

oh, co che gusto, Mama, co che festa mi lassava sto mondo dei signori, per goderme co ti la pase onesta!

Quel póvaro ortesèl no gavea fiori, quela caseta no gavea beleze : ma 'l to ben, no 'l valea tuti i tesori?

Là, mi sentiva ancora le careze avude da putelo, quando un baso cambiava i pianti subito in legreze;

là, mi trovava, sempre, in ogni caso, el conforto più dolze, el più seguro, che me fazea tranquilo e persuaso. Anca 'dêsso, cô vedo tuto scuro,

e me par che la vita sia un tormento,

e l' avegnir più tristo me figuro,

anca 'dêsso, el pensier qualche momento me porta a casa, come ai dì più bei; e là te trovo, e da vizin me sento;

te me passa la man per i cavéi, te me varda beata, e te me dise « Bravo, fiol!... Come stali i to putei?

E, quel' ociada, in fin a le radise la me riva del cuor; e tuto, tuto la me ricorda, tuto la predise. Quanti dolori, Mama, xe sta 'l fruto de la to vita bona! E, per chi vive, oh quanto ancora ghe xe indrìo de bruto!

to,

utei?

Ti, cara, intanto, su le nostre rive te dorme in pase; e mi te benedisso co 'l cuor che pianze e co la man che scrive.

El mondo gira; tanto, che un subisso, una roda che vola, mi lo credo; gira la roda, e mi la vardo fisso;

ma, co i oci del cuor, Mama, mi vedo
sempre un mureto, sempre 'na pignera,
sempre un rosèr che trema al primo fredo,
sempre el to nome, Mama, su la piera.

